

Ruthy Vrieswijk-Bergen:

‘Bon dia yen di alegria’



ORANJESTAD - Shonnan tur, un bon y feliz siman nobo colma cu salud y alegria! Sperando cu boso nan tambe a gosa di boso dushi fin di siman, aunke tur dia ta un dushi dia y dushi momento pa celebra bida den y cu famia y amigonan. Den e fin di siman aki, Lady Ruth a compania su amiga poeta artista pintor Laureen Eman, kende cu e team di Bazrrr ta den full preparacion cu e ultimo tokenan pa su Solo Expo bou di e capa di “Creation”, un coleccion di cuadranan di tur color, expresando y reflehando cosnan bunita di nos creacion y naturalesa. Set up di un expo ta tuma hopi tempo, pasobra bo kier pa

tur cos ta nechí y bunita hinca den otro.

Y sigur e secuencia di e cuadranan pa conta su storia. Manera hopi di boso por a lesa caba y wak na television den noticia, e apertura di e bunita exposicion aki ta diaranson dia 28 di augustus 2019 pa den careda di 6pm di atardi na e lugá BAZRRR, den curason di Oranjestad, caminda antes tawata Sport Caribe, net na banda unda tawata La Linda di mucha antes, awel, na e otro banda di caminda. Bazrrr ta un galeria y un coffeehouse por bisa, cu su dushi hapjesnan y juicenan fresco di entre otro lamunchi etc. pero tambe biña y mas. Nan ta bende cuadranan y hopi cos mas di arte. Nan tin

tayer tocante moda y hopi mas. Josie y su team ta haci nan best pa laga tur hende sinti nan mes na cas.

E luga mes ta un obra di arte riba su mes. Imagina bo awor cu bo por admira y inspira cu tur e bunita obranan di arte di e artista multifacetico Laureen Eman. Laureen ta conoci pa su talentonan tambe di skirbi poema, quotes, y versjenan bunita cu ta acompaña su obranan di arte.

Laureen sa canta y baila y tambe toca piano masha bunita mes, su talentonan natural. Pero e cos cu e ta haci mas bunita, segun Lady Ruth, ta pinta su cuadranan impactante. Cuadranan cu ta papia cu bo curason inspira.

Tur hende ta bon bini pa bin wak y admira su cuadranan for di dia 29 di augustus te 7 di September. E diaranson dia 28 di augustus ta pa invitadonan special di curason cu tambe ta amantenan di arte. Papiando di arte, dia 4 di september awor 7pm anochi lo bay tin e ultimo Poetry Night pa e aña aki y e lo ta den BAZRRR, net un bon ocasion pa coleganan poeta escritor admira e bunita obranan di arte di e artista Laureen Eman. E ta bay ta den un tremendo dushi ambiente di arte y mas arte. Basha Foundation ta bay tuma un break despues di esaki y prepara pa cuminsa bek otro aña. Tempo sa pasa lihe y fin di aña tur hende ta ocupa cu nan mesun cosnan y asina poetanan tambe por reflexiona un crenchi riba nan skirbimento. Imagina bo un palo, pinta pa Laureen mes, como background pa colga mas obranan di arte di dje, cu tur sorto di arte den dje, manera un kerstboom den



zomer cu ta alegre bo curason cu colorman di bida. Creation of Creacion ta su tema den su obranan e biaha aki y cada un ta diferente y unico cu su certificado di ta un obra original, autentico y unico.

Nos ta topa boso anto na BAZRRR, 28 augustus of duran-

te e dianan te 7 di september, na unda e artista Laureen mes lo t'ey entre 4 y 8or di anochi durante henter e siman di exposicion. Danki di antemano pa boso bishita di curason! Pasa un dushi dia yen di alegria y un bon siman cu amor, paz y inspiracion !!!

